

বাংলাদেশ



গেজেট

অতিরিক্ত সংখ্যা

কর্তৃপক্ষ কর্তৃক প্রকাশিত

বৃহস্পতিবার, আগস্ট ২, ২০১৮

[বেসরকারি ব্যক্তি এবং কর্পোরেশন কর্তৃক অর্থের বিনিময়ে জারীকৃত বিজ্ঞাপন ও নোটিশসমূহ]

টেকসই ও নবায়নযোগ্য জ্বালানি উন্নয়ন কর্তৃপক্ষ

বিদ্যুৎ বিভাগ

বিদ্যুৎ, জ্বালানি ও খনিজ সম্পদ মন্ত্রণালয়

প্রজ্ঞাপন

তারিখ : ১৩ বৈশাখ ১৪২৫ বঙ্গাব্দ/২৬ এপ্রিল ২০১৮ খ্রিস্টাব্দ

এস, আর, ও নং ১২২-আইন/২০১৮।—টেকসই ও নবায়নযোগ্য জ্বালানি উন্নয়ন কর্তৃপক্ষ আইন, ২০১২ (২০১২ সনের ৪৮নং আইন) এর ধারা ২৭, ধারা ৬ এর দফা (৬) এর সহিত পঠিতব্য, এ প্রদত্ত ক্ষমতাবলে টেকসই ও নবায়নযোগ্য জ্বালানি উন্নয়ন কর্তৃপক্ষ, সরকারের পূর্বানুমতিক্রমে, নিম্নরূপ প্রবিধানমালা প্রণয়ন করিল, যথা :—

প্রথম অধ্যায়

প্রারম্ভিক

১। শিরোনাম।—(১) এই প্রবিধানমালা জ্বালানি নিরীক্ষা প্রবিধানমালা, ২০১৮ নামে অভিহিত হইবে।

২। সংজ্ঞা।—(১) বিষয় বা প্রসঙ্গের পরিপন্থি কোনো কিছু না থাকিলে, এই প্রবিধানমালায় —

- (ক) “আইন” অর্থ টেকসই ও নবায়নযোগ্য জ্বালানি উন্নয়ন কর্তৃপক্ষ আইন, ২০১২ (২০১২ সনের ৪৮নং আইন);
- (খ) “কর্তৃপক্ষ” অর্থ আইনের ধারা ৪ এর অধীন প্রতিষ্ঠিত টেকসই ও নবায়নযোগ্য জ্বালানি উন্নয়ন কর্তৃপক্ষ;
- (গ) “জ্বালানি” অর্থ আইনের ধারা ২ এর দফা (৫) এ সংজ্ঞায়িত জ্বালানি;
- (ঘ) “জ্বালানি নিরীক্ষক” অর্থ প্রবিধি ৮ এর অধীন জ্বালানি নিরীক্ষা সনদপ্রাপ্ত কোনো জ্বালানি নিরীক্ষক;

( ৯৭১৭ )

মূল্য : টাকা ৪০.০০

- (ঙ) “জ্বালানি নিরীক্ষা সনদ” অর্থ প্রবিধি ৮ এর অধীন প্রদত্ত জ্বালানি নিরীক্ষা সনদ;
- (চ) “জ্বালানি নিরীক্ষণ প্রতিষ্ঠান” অর্থ প্রবিধি ১২ এর উপ-প্রবিধি (৩) এর অধীন নিবন্ধিত জ্বালানি নিরীক্ষণ প্রতিষ্ঠান;
- (ছ) “জ্বালানি ব্যবস্থাপক” অর্থ আইনের ধারা ২ এর দফা (৮) এ সংজ্ঞায়িত জ্বালানি ব্যবস্থাপক;
- (জ) “ডেজিগনেটেড কঞ্জুমার” অর্থ আইনের ধারা ২ এর দফা (১২) এ সংজ্ঞায়িত ডেজিগনেটেড কঞ্জুমার;
- (ঝ) “ফরম” অর্থ এই প্রবিধানমালার কোনো ফরম;
- (ঞ) “বিধিমালা” অর্থ জ্বালানি দক্ষতা ও সংরক্ষণ বিধিমালা, ২০১৬; এবং
- (ট) “স্থাপনা” অর্থে যে কোনো ইমারত বা ইমারতের অবিচ্ছেদ্য অংশ যেখানে অনূন ৫০ (পঞ্চাশ) কিলোওয়াট বা ততোধিক ওয়াটের বৈদ্যুতিক সংযোগ রহিয়াছে এবং কারখানা ও দোকানও ইহার অন্তর্ভুক্ত হইবে।

(২) এই প্রবিধানমালায় ব্যবহৃত যে সকল শব্দ বা অভিব্যক্তির সংজ্ঞা প্রদান করা হয় নাই, সেই সকল শব্দ বা অভিব্যক্তি আইনে বা বিধিমালায় যেই অর্থে ব্যবহৃত হইয়াছে সেই অর্থে প্রযোজ্য হইবে।

### দ্বিতীয় অধ্যায়

জ্বালানি নিরীক্ষকের যোগ্যতা, জ্বালানি নিরীক্ষা সনদ পরীক্ষা, ইত্যাদি

৩। জ্বালানি নিরীক্ষকের যোগ্যতা।—কর্তৃপক্ষ বা তদকর্তৃক নিযুক্ত কোনো প্রতিষ্ঠান কর্তৃক অনুষ্ঠিত জ্বালানি নিরীক্ষা সনদ পরীক্ষায় উত্তীর্ণ ব্যক্তি জ্বালানি নিরীক্ষক হইবেন।

৪। জ্বালানি নিরীক্ষা সনদ পরীক্ষায় অংশগ্রহণের যোগ্যতা।—জ্বালানি নিরীক্ষা সনদ পরীক্ষায় অংশগ্রহণের জন্য নিম্নবর্ণিত কোনো যোগ্যতা থাকিতে হইবে, যথা :—

- (ক) বিদ্যুৎ ও জ্বালানি সংক্রান্ত বিষয়ে অনূন ৩ (তিন) বছরের কর্ম অভিজ্ঞতাসহ মেকানিক্যাল, ইলেক্ট্রিক্যাল, কেমিকেল বা ইন্ডাস্ট্রিয়াল এন্ড প্রোডাকশন ইঞ্জিনিয়ারিং বিষয়ে স্নাতক ডিগ্রি;
- (খ) বিদ্যুৎ ও জ্বালানি সংক্রান্ত বিষয়ে অনূন ২ (দুই) বছরের কর্ম অভিজ্ঞতাসহ মেকানিক্যাল, ইলেক্ট্রিক্যাল, কেমিকেল বা ইন্ডাস্ট্রিয়াল এন্ড প্রোডাকশন ইঞ্জিনিয়ারিং বিষয়ে স্নাতকসহ প্রকৌশলে অথবা ব্যবস্থাপনা বিষয়ে স্নাতকোত্তর ডিগ্রি;
- (গ) বিদ্যুৎ ও জ্বালানি সংক্রান্ত বিষয়ে অনূন ৩ (তিন) বছরের কর্ম অভিজ্ঞতাসহ পদার্থবিদ্যা, গণিত শাস্ত্র, ইলেক্ট্রনিক্স বা রসায়ন শাস্ত্রে (স্নাতক পর্যায়ে পদার্থবিদ্যা এবং গণিত শাস্ত্র থাকিতে হইবে) স্নাতকোত্তর ডিগ্রি; অথবা
- (ঘ) বিদ্যুৎ ও জ্বালানি সংক্রান্ত বিষয়ে অনূন ৭ (সাত) বছরের কর্ম অভিজ্ঞতাসহ মেকানিক্যাল বা ইলেক্ট্রিক্যাল বা পাওয়ার বিষয়ে ডিপ্লোমা ও কর্তৃপক্ষ কর্তৃক অনুমোদিত কোনো প্রতিষ্ঠান হইতে জ্বালানি নিরীক্ষা বিষয়ে প্রশিক্ষণপ্রাপ্ত;

৫। জ্বালানি নিরীক্ষা সনদ পরীক্ষা পরিচালনা।—(১) কর্তৃপক্ষ স্বয়ং বা তদকর্তৃক নিযুক্ত কোনো প্রতিষ্ঠান জ্বালানি নিরীক্ষা সনদ পরীক্ষা পরিচালনা করিতে পারিবে।

(২) উপ-প্রবিধি (১) এর অধীন কোনো প্রতিষ্ঠান জ্বালানি নিরীক্ষা সনদ পরীক্ষা পরিচালনার উদ্দেশ্যে নির্বাচনের ক্ষেত্রে কর্তৃপক্ষ প্রয়োজনীয় মানদণ্ড নির্ধারণ করিবে এবং উক্তরূপ মানদণ্ড নির্ধারণের ক্ষেত্রে নিম্নবর্ণিত বিষয়াদি বিবেচনা করিতে হইবে; যথা :—

- (ক) পরীক্ষা পরিচালনার জন্য সংশ্লিষ্ট প্রতিষ্ঠানের সক্ষমতা, ভৌত ও অবকাঠামোগত এবং উন্নত পরীক্ষাগারের সুবিধা;
- (খ) প্রশ্নপত্র প্রণয়ন ও উত্তরপত্র মূল্যায়নে চাহিদা অনুযায়ী প্রাপ্ত দক্ষ জনশক্তি;
- (গ) পূর্ববর্তী কাজের অভিজ্ঞতা;
- (ঘ) কর্তৃপক্ষ কর্তৃক, সময় সময়, নির্ধারিত অন্যান্য মানদণ্ড।

(৩) কর্তৃপক্ষ জ্বালানি নিরীক্ষা সনদ পরীক্ষা পরিচালনার জন্য কোনো প্রতিষ্ঠানের সহিত চুক্তি সম্পাদন করিতে পারিবে।

(৪) নিম্নবর্ণিত কোনো কারণে উপ-প্রবিধি (৩) এর অধীন সম্পাদিত চুক্তি বাতিল করা যাইবে, যদি উক্ত প্রতিষ্ঠান—

- (ক) এমন কোনো কাজ করে বা করা হইতে বিরত থাকে যাহা পেশাগত অসদাচরণ হিসাবে বিবেচিত;
- (খ) এমন কোনো কাজ করে যাহা জালিয়াতি হিসাবে বিবেচিত;
- (গ) যথাযথ পদ্ধতিতে পরীক্ষা পরিচালনা করিতে ব্যর্থ হয়;
- (ঘ) চুক্তির কোনো শর্ত লঙ্ঘন করে;
- (ঙ) এমন কোনো কাজ করে যাহাতে জনস্বার্থ লঙ্ঘিত হয় বা হইবার সম্ভবনা থাকে।

(৫) কর্তৃপক্ষ কর্তৃক সংশ্লিষ্ট প্রতিষ্ঠানকে শুনানির সুযোগ প্রদান না করিয়া উপ-প্রবিধি (৪) এর অধীন কোনো চুক্তি বাতিল করা যাইবে না।

৬। জ্বালানি নিরীক্ষা সনদ পরীক্ষায় অংশগ্রহণের বিজ্ঞপ্তি, ইত্যাদি।—(১) কর্তৃপক্ষ অথবা প্রবিধি ৫ এর উপ-প্রবিধি (১) এর অধীন নিযুক্ত প্রতিষ্ঠান জ্বালানি নিরীক্ষা সনদ পরীক্ষা গ্রহণের তারিখ, সময় ও স্থান সম্পর্কে জাতীয় পত্রিকা এবং ওয়েব সাইটে প্রকাশ করিবে।

(২) জ্বালানি নিরীক্ষা সনদ পরীক্ষায় অংশগ্রহণের জন্য আগ্রহী ব্যক্তিকে পে-অর্ডার/ডিডি এর মাধ্যমে ২ (দুই) হাজার টাকা আবেদন ফি এবং ৮ (আট) হাজার টাকা পরীক্ষা ফিসহ কর্তৃপক্ষ বরাবর ফরম-১ অনুসারে আবেদন করিতে হইবে।

(৩) উপ-প্রবিধি (২) এর অধীন আবেদন প্রাপ্তির পর কর্তৃপক্ষ, বা ক্ষেত্রমত, তদকর্তৃক নিযুক্ত প্রতিষ্ঠান আবেদনপত্র যাচাই-বাছাই করিয়া যোগ্য প্রার্থীদের তালিকা প্রস্তুত করিবে এবং পরীক্ষা শুরু হইবার অনূন্য ১৫ (পনেরো) দিন পূর্বে যোগ্য প্রার্থী বরাবর প্রবেশপত্র ইস্যু করিবে, যাহাতে পরীক্ষা শুরুর তারিখ, সময় ও স্থানের উল্লেখ থাকিবে।

(৪) কর্তৃপক্ষ তদকর্তৃক নিযুক্ত প্রতিষ্ঠান জ্বালানি নিরীক্ষা সনদ পরীক্ষা অনুষ্ঠানের ৩ (তিন) মাস পূর্বে সিলেবাস, পাঠ্যপুস্তকসহ প্রসপেক্টাস প্রস্তুতপূর্বক সহজে প্রাপ্তির লক্ষ্যে উদ্যোগ গ্রহণ করিবে এবং প্রয়োজনে ওয়েবসাইটে প্রকাশের ব্যবস্থা গ্রহণ করিবে।

৭। জ্বালানি নিরীক্ষা সনদ পরীক্ষার বিষয়সমূহ এবং পরীক্ষায় উত্তীর্ণের মানদণ্ড।—(১) জ্বালানি নিরীক্ষা সনদ পরীক্ষার জন্য প্রার্থীকে কর্তৃপক্ষ কর্তৃক নির্ধারিত বিষয়ে পরীক্ষা দিতে হইবে।

(২) জ্বালানি নিরীক্ষা সনদ পরীক্ষার মাধ্যম হইবে ইংরেজি।

(৩) প্রতিটি বিষয়ের উত্তীর্ণের নম্বর হইবে ৭০ (সত্তর) শতাংশ।

(৪) যদি কোনো প্রার্থী কোনো একটি বিষয়ে অনুত্তীর্ণ হন, সেক্ষেত্রে উক্ত বিষয়ের জন্য তিনি ৪ (চার) হাজার টাকা ফি প্রদান সাপেক্ষে, পরবর্তী নিয়মিত ৩ (তিন) টি পরীক্ষার মধ্যে সর্বোচ্চ ২ (দুই) বার উক্ত অনুত্তীর্ণ পরীক্ষায় অংশগ্রহণের সুযোগ পাইবেন।

৮। জ্বালানি নিরীক্ষা সনদ।—কর্তৃপক্ষ জ্বালানি নিরীক্ষা সনদ পরীক্ষায় উত্তীর্ণ প্রার্থীগণকে ফরম-২ অনুসারে জ্বালানি নিরীক্ষা সনদ প্রদান করিবে।

৯। জ্বালানি নিরীক্ষা সনদের মেয়াদ ও নবায়ন।—(১) জ্বালানি নিরীক্ষা সনদের মেয়াদ হইবে ৫ (পাঁচ) বৎসর এবং প্রতি ৫ (পাঁচ) বৎসর অন্তর অন্তর উহা নবায়নযোগ্য হইবে।

(২) জ্বালানি নিরীক্ষা সনদ নবায়নের উদ্দেশ্যে পে-অর্ডার/ডিডি এর মাধ্যমে ১০ (দশ) হাজার টাকা নবায়ন ফিসহ ফরম-৩ অনুসারে কর্তৃপক্ষের নিকট আবেদন করিতে হইবে।

(৩) উপ-প্রবিধি (২) এর অধীন আবেদন প্রাপ্তির পর কর্তৃপক্ষের নিকট যদি প্রতীয়মান হয় যে, আবেদনকারীর পূর্ববর্তী কর্মকাণ্ড সন্তোষজনক এবং তিনি পূর্ববর্তী ৪ (চার) বৎসরে ৫ (পাঁচ)টি স্থাপনায় জ্বালানি নিরীক্ষা সম্পাদন করিয়াছেন তাহা হইলে তাহার জ্বালানি নিরীক্ষা সনদ নবায়ন করিবে।

তৃতীয় অধ্যায়

জ্বালানি ব্যবস্থাপক, জ্বালানি নিরীক্ষকের দায়িত্ব, ইত্যাদি

১০। জ্বালানি ব্যবস্থাপকের দায়িত্ব।—জ্বালানি ব্যবস্থাপকের দায়িত্ব হইবে নিম্নরূপ, যথা :—

- (ক) ডেজিগনেটেড কঙ্কুমারের স্থাপনার সকল প্রধান প্রধান যন্ত্রপাতি ও সিস্টেমের জ্বালানি দক্ষতা পরিবীক্ষণ করা;
- (খ) জ্বালানির অদক্ষ এবং অপচয়মূলক ব্যবহার হ্রাসের ব্যবস্থা করা;
- (গ) জ্বালানি ব্যবহারের উপর ডেজিগনেটেড কঙ্কুমার কর্তৃক ফরম-৪ অনুযায়ী প্রতিপালন প্রতিবেদন এবং ফরম-৫ অনুসারে বার্ষিক জ্বালানি প্রতিবেদন প্রণয়নের ক্ষেত্রে প্রয়োজনীয় তথ্য ও সহায়তা প্রদান করা।

১১। জ্বালানি নিরীক্ষকের দায়িত্ব।—জ্বালানি নিরীক্ষকের দায়িত্ব হইবে নিম্নরূপ, যথা :—

- (ক) ডেজিগনেটেড কঙ্কুমারের স্থাপনায় এবং ক্ষুদ্র শিল্প ও মাঝারি শিল্প স্থাপনায় ফরম-৬ অনুসারে জ্বালানি নিরীক্ষা প্রতিবেদন প্রস্তুত করা;
- (খ) ব্যয়-হ্রাস, কার্বন ফুটপ্রিন্ট হ্রাস, ব্যবসায়িক প্রতিযোগিতায় উৎকর্ষতা ইত্যাদি বিষয়সহ জ্বালানি সংরক্ষণের সার্বিক সুফল সম্পর্কে তথ্য প্রদানের মাধ্যমে গ্রাহককে উদ্বুদ্ধ করা; এবং
- (গ) জ্বালানি সংরক্ষণ ব্যবস্থার বিষয়ে ডেজিগনেটেড কঙ্কুমারকে অবহিত করা।

চতুর্থ অধ্যায়

জ্বালানি নিরীক্ষণ প্রতিষ্ঠানের নিবন্ধন, ইত্যাদি

১২। জ্বালানি নিরীক্ষণ প্রতিষ্ঠান নিবন্ধন।—(১) জ্বালানি নিরীক্ষণ প্রতিষ্ঠান নিবন্ধনের জন্য ৫০ (পঞ্চাশ) হাজার টাকা ফিসহ ফরম-৭ অনুসারে কর্তৃপক্ষের নিকট আবেদন করিতে হইবে।

(২) জ্বালানি নিরীক্ষণ প্রতিষ্ঠানে থার্মাল/মেকানিক্যাল ও ইলেকট্রিক্যাল সিস্টেম বিষয়ক অনূন একজন জ্বালানি নিরীক্ষক থাকিতে হইবে।

(৩) উপ-প্রবিধি (১) এর অধীন আবেদন প্রাপ্তির পর কর্তৃপক্ষের নিকট যথাযথ বলিয়া বিবেচিত হইলে উক্ত প্রতিষ্ঠানকে জ্বালানি নিরীক্ষণ প্রতিষ্ঠান হিসাবে নিবন্ধন করিবে এবং ফরম-৮ অনুসারে নিবন্ধন সনদ প্রদান করিবে এবং যথাযথ বলিয়া বিবেচিত না হইলে কারণ উল্লেখপূর্বক আবেদনটি নামঞ্জুর করিবে এবং সংশ্লিষ্ট আবেদনকারীকে অবহিত করিবে।

